

唐陸宣公集卷第五

長沙楊
煥武敬刊

制誥

慰勞招撫
處分事

奉天遣使宣慰諸道詔

古者天子巡狩之義以考國典以觀人風在時多虞或
所不暇乃命卿士使於四方問人疾苦廉吏善惡苟副
所任則如親臨在理平之時尙資勤恤當喪亂之際得
無資憂朕以不敏肆於人上撫馭失道誠感未孚寇盜
繁興阻兵拒命哀哉臣庶陷於匪人罄茲田疇鞠爲茂
草不念柔復遽命徂征徵發兵甲萬里必至暴露營壘

連年不息冒於鋒刃繼以死傷煢嫠無依父母廢食存
者積思家之怨歿者倍異鄉之痛又以軍費滋廣公儲
不充厚取於人罔率厥典科條互設誅斂無常農工廢
棄其生業商賈咨嗟於道路軍營日益閭井日空凋瘵
日窮徭役日甚以財力之有限供求取之無涯暴吏肆
威鞭笞督責嗷嗷黔首控告何依怨氣上騰咎徵斯應
疫癘荐至水旱相乘罪非朕躬誰任其責朕自嗣位迨
今六年連兵不解已踰四稔雖本非獲已義在濟人而
事乃重勞敢忘咎已皆以朕之寡昧居安忘危致寇之
由實在於此予則不德人亦何幸愧恨積中痛心疾首昨

者改元施令悔往布新將反側獲安則干戈日弭賦役
差減則羣庶就康還定流亡與之休息猶懼思慮未周
於庶務誠感未達於遐方一理失中一夫不獲則何以謝
天譴致人和俾代予言其在良弼宜令門下侍郎同中
書門下平章事蕭復充山南東西鄂岳荆南江西淮南
淮南浙江東西嶺南福建等道宣慰安撫嗚呼往率乃
職敬敷朕命慰勉征戍勞徠困窮訪其所安察其所弊
淹滯必達冤濫必申無憚幽遠而不被無畧細微而不
恤泊乎編氓比屋咸若朕之躬親股肱惟良予則有賴
其諸道將士並準今年正月一日制嚴備疆界勿使侵

擾仍各令本使本將速具名銜等聞奏悉與甄敘其殊
功勁節超越常倫別條績當特優獎百姓除每年兩
稅定額外自餘徵率一切並停課勸農桑各令安業寇
難既定漸息干戈朕當躬先簡約庶務節省兩稅之內
亦更減除其諸道事緣急切須處分者卽與所在節度
觀察使商議裁度務合便宜其餘利害還日條奏朕當
詳省以擇厥中宣布遠邇咸使聞知

收復京師遣使宣慰將吏百姓詔

朕獲承先顧付以大器懼德不類貽列聖羞虔恭惕厲
罔敢暇逸將欲立法齊一致俗和平小信未孚眾心遂

阻事理乖當百度失中君臣之間鬱堙不達致寇雖深
於罪已興戎猶昧於省躬期靖亂以濟人反勞師而黷
武行者被殺傷之苦居者重齎送之勞四海騷然靡有
甯處京輦之下杼軸亦空環列之中遣戍殆盡畧內以
勤遠居安而忘危賊臣誘姦乘閒竊發豺狼穢於宮闕
士庶陷於塗炭作威肆戮仇視我人萬姓嗷嗷呼天罔
告有殞蹈以抗節有脅從以假命且一夫不獲辜實在
予朕君臨萬邦作人父母旣不克覆育又從而咎之其
心愧恥一食三歎退舍內訟介於梁岷庶乎有瘳以答
譴戒皇天悔禍宗社降靈腹心爪牙奮謀宣力元惡稔

慝脫身逃遁餘黨歸誠率眾款附埽氛殄而闢閭闔翦
鯨鯢以清郊原函夏載甯室家相慶非將士夾輔王室
非卿士交修予違軍旅叶心畢命盡敵豈伊寡昧克復
興運戡定大難載感予懷宣令吏部侍郎班宏充上都
宣慰使勞問將士撫綏烝黎招輯流亡慰安反側朕續
整飭法駕擇日還京告謝於祖宗請罪於天地策勳行
賞大報忠烈銘功永代與國同休明宣朕懷咸使知悉
平淮西後宴賞諸軍將士放歸本道詔

朕纂奉丕業託於人上仁不被物義不勝姦頌聲蔑聞
累亂連起叛臣希烈竊據淮沂誠則彼夫無良亦由朕

之不德撫御之道失之於初師旅一興縣聯莫解服勞者從役不暇受污者無路自新旱蝗相乘穀糴翔貴兵氓餒死十室九空通邑化爲邱墟遺骸遍於原野每念於此傷心涕流且自昔勞師靡有不悔以虞舜之聖屈於苗人漢武之強弊於戎虜矧乎德猶不逮力或未全我其永懷求已自警乃者下哀痛之詔布寬大之恩普天載新殊死必宥然尙勞師旅作扞邊陲有累歲棄離家室有經時不解甲冑忠雖爲國咎實在予君人若斯甯不知愧賴節將士旅一其誠心奮發武威慎固疆宇遠人思服元惡就誅烝黎方致於安甯役戍永期於休

息懋官以旌善錫宴以勞旋賞不踰時式遵彝典都統
檢校司空同中書門下平章事劉從一時與子孫一人
五品正員官鄭滑節度使檢校尚書右僕射李澄檢校
兵部尚書曲環檢校戶部尚書李皋兼御史大夫樊澤
等並與子孫一人七品正員官都防禦使工部尚書御
史大夫賈耽都團練使檢校左散騎常侍兼御史大夫
盧元卿兼御史大夫張建封等並與子孫一人八品正
員官檢校司空同中書門下平章事李抱真檢校司空
同中書門下平章事李納檢校尚書右僕射同中書門
下平章事韓滉檢校工部尚書御史大夫田緒咸遣士

旅遠赴行營同討不庭厥有成績抱真納浼宜並與子
孫一人七品正員官緒與子孫一人八品正員官應與
淮西接界州縣本界鎮守及諸道赴行營將士等宜共
賜物三十萬端匹以充賞設度支卽約據界首及行營
軍額分配定數逐便支送仍委本道都統節度防禦都
團練使卽條錄功第名銜聞奏並與甄敘其行營將士
仍各放歸本道明加宣諭令悉朕懷

授王武俊李抱真官封并招諭朱滔詔

三公之職論道經邦序五行之和任百事之理[厯]代崇
重不常厥官天祚皇家茂生才傑比義齊列同寅協恭

以德充台階之望以勳當井賦之賜聿應並命式副具
瞻開府儀同三司檢校司空同中書門下平章事使持
節恆州諸軍事守恆州刺史充成德軍恆冀深趙等州
節度觀察處置等使琅邪郡王王武俊秉志沉密臨事
能斷忠而致力勇且有仁奮發之初渠魁卽戮危疑之
際大節首彰開府儀同三司檢校尚書左僕射同中書
門下平章事潞州大都督府長史昭義軍澤潞磁邢等
州節度觀察處置度支營田等使上柱國符陽郡王李
抱真質重氣和內精外朗智窮變化守必以常學本明
誠動有攸利謀猷屢告規益孔多皆戮力盡瘁志匡王

室陳師鞠旅同討不庭仗大義而萬眾叶心體至公而
千里同契合軍於呼吸之際決策於指揮之間并轡載
馳執桴親鼓兕徒殄殪河右廓清國家無北顧之虞姦
慝阻南侵之計時乃同德厥功茂焉敷五教而阜人均
九土以居眾俾爾更踐備揚洪休乃加真實以貽後嗣
武俊可檢校司徒同中書門下平章事抱真可檢校司
空同中書門下平章事賜實封五百戶嗚呼古人有言
曰惟理亂在庶官矧惟輔臣與國同體明朕德命爾其
欽承朕嗣位不明輕費尙力謂武可以靖暴慢謂刑可
以懲姦邪德之不修亂是用長士馬疲耗庶流離罪

非朕躬誰任其咎自去歲遭變再經播遷厯山川之險
艱知軍旅之勞苦惟省前過悔恨盈懷追遠事而不及
庶後圖之可補以九廟爲重而不憚屈身以百姓爲心
而不專私欲苟可以保安社稷休息甲兵宏濟蒼生蠲
省徭賦含垢忍恥予無難焉朱滔受任薊門累著誠績
委遇旣重封秩亦崇臣節中虧自貽伊阻泊賊泚僭竊
上京兄弟之親在法無赦朕以罪不相及情有可原待
以如初之誠廣其自新之路執迷不復固敗是求蹙喪
而歸旣困方悟累獻款疏深陳懇誠省之惻然良用憫
歎雖將相嫉惡之志固所難容以君上懷柔之情未忍

拒絕且善莫大於改過德莫盛於好生叛而伐之服而
舍之銷難愛人實

惟朕志宜委武俊抱真開示大信明加曉諭若誠心歸國善蹟克彰朕當掩暨錄勲與之昭雪宣告眾庶咸使聞知

招諭淮西將吏詔

朕臨御已來連兵不息自經播越方麻險艱耳聞鼙鼓
之聲目視殺傷之苦由是覺悟悔於興師既省已以知
非亦欲人之遷善至乃歲有再赦事有屢言務於撫綏
不憚煩冗冀朕之誠信日布冀人之患難日除每議用
兵惻然不忍而賊臣希烈煽禍滔天虐用其人仇視厥
眾狼心多忌梟性無親以芟伐立威以猜刻爲志朝爲
昵比夕爲仇讐肆其芟夷蔑若草芥馮陵汝海流血盈

川侵軼浚郊積骸遍野農耕廢業井邑成墟積彼妖氛
發爲災癘蕭條千里無復人煙朕哀彼生靈陷於塗炭
苟存拯物不難屈身故於首春特布新令赦其殊死待
以初誠使臣纔越於郊畿巨猾已聞於潛竊酷烈滋甚
吞噬無厭將相大臣咸懷憤激繼陳章疏固請除討朕
以所行天誅本去人害兵戈旣接玉石難分言念忠良
遭罹脅制雖欲卻陳臣節厥路無由受污終身銜冤沒
代淪胥以逞誠足痛傷宜令諸道節度使每欲進軍先
加曉諭今所致討唯止元兇其餘脅從一切不問如能
去逆効順因事建功明設科條以示褒勸其以一州降

者便授刺史封異姓王賜實封五百戶以一萬人已上
降者授刺史封國公賜實封三百戶其餘各據功效節
級甄升列爵建官以俟能者朗然明信朕不食言宣示
遠人各令知悉

招諭河中詔

逆方諸軍應在河中絳州朝邑將士等並以義烈繼代
勳業冠時艱虞已來常濟國難肅宗代宗再復京邑皆
是朔方將士之功去歲朕在奉天兇黨攻逼解圍赴急
亦賴此軍言念爪牙情均骨肉濟朕危厄感之豈忘頃
以懷光背恩自生猜阻熒惑將士污脅忠良朕頻降詔

書再三曉諭皆被懷光隱匿兼亦志有加誣朕之誠懷
竟未宣布夙夜自愧寢食不安時屬嚴凝屢頒衣賜豈
以懷光一人拒命遂令將士俱不霑恩朕於功臣義存
終始其朔方及諸軍應在河中絳州朝邑將士等今年
春冬衣賜並準二月二十一日勅緣赴奉天解圍功臣
等第給錢物宜令所司并許計料別收貯待道路通流
卽當時支遣其有歸順者續給其將士等有先賜實封
一切準元勅並州給牒委馬燧渾瑊逐分送付其差人
請受仍明加宣諭招撫務令忠義之士各悉朕意

安撫淮西歸順將士百姓勅